

四庫全書

集部

欽定四庫全書

集部

涉齋集卷一
一至三

詳校官庶吉士臣吳烜

主事臣呂雲棟覆勘

謄錄副貢生臣杭光晉

謄錄監生臣雷林

欽定四庫全書

集部四

涉齋集卷一

別集類三 宋

提要

臣等謹案涉齋集永樂大典題許綸撰集中
王晦叔惠聽雨圖詩序自稱永嘉人隆興元
年進士累官至知樞密院事與自序永嘉人
合藝文志載許及之文集三十卷涉齋課稿
九卷與今本涉齋之名合焦竑經籍志載許

右府涉齋集三十卷宋人稱樞密為右府與及之本傳官知樞密院者又合則此集當為及之所撰又宋史寧宗本紀紹熙四年六月遣許及之賀金主生辰金史交聘表亦同今集中使金之詩一一具在本傳稱及之嘗為宗正簿今集中亦有題玉牒所壁間詩則此集出于及之尤證佐鑿然永樂大典所題不知何據或及之初名綸史偶未載更名事歟

此集世無傳本今据撫殘牘編為十八卷觀
其讀王文公詩絕句曰文章與世為師範經
術于時起世讐少讀公詩頭已白只應無奈
句風流知其辯香在王安石安石之文平挹
歐蘇而詩在北宋諸家之中其名稍亞然早
年鍛鍊鎔鑄工力至深瀛奎律髓引司馬光
之言稱其晚年諸作華妙精深殆非虛譽是
集雖下筆稍易未能青出于藍而氣體高亮

要自琅琅盈耳較宋末江湖詩派刻畫瑣屑者過之遠矣乾隆四十六年三月恭校上

總纂官

臣紀昀

臣陸錫熊

臣孫士毅

總校官

臣

陸

費

墀

欽定四庫全書

涉齋集卷一

宋 許綸 撰

五言古詩

新晴

連旬困梅霖接夏潦垂潄泄雲渙新霽遊興難管束出
關便航湖停篙葑蒲綠漁歌入浦溆沙禽亂驚浴昏霏
送霞落依稀辨林谷初更電輝搖輕雷忽相續蛙聲雜
猛雨波翻碎鳴玉何能足清睡快舉卮酒沃明朝看晨

光未必非所欲

次韻葉德友苦熱吟

避暑本無法有法心可移達尊迫人事盛服嚴天威六月厲戈甲百鍊親鑪錘前驅上峻坂後鞭禁長吁正午萬竈增尅晷千夫炊轅門待排結軍令無徐舒陸渾救急燎藥已稽嚙霏期以片時減不許一草萎醲賞激勇往畢力爭忘疲不計揮汗雨寧思濯風漪當其用力所宜復知熱時萬事心地存百夫火宅馳四時更代謝二

至爭愆逾積陰理必復大夏陽常居及此當歆詭豈得
懷鬱紆杜願踏層冰幾欲投清池韓思坐深甌為說亦
豈疎極知隸元氣孰與逃象滋聊用供嘲咏且以相戲
娛吾儕幸安適家食饕餮委蛇念彼方熱耘焉能思逃虛
靜勝昔人心屢空斯晏如况予負深譴省咎闔重扉友
朋相急難往復通有無每懷子葉子久與期襟期有此
苦熱吟句韻兩崛竒

喜雨次韻翁常之苦熱吟

義和不弭馭炎帝方秉機孰不愛趙衰誰肯觸武威豈
知鑠金石乃得齊璿璣鹿角甫云解葵箠無停揮萬寶
成南說一枕安北扉殿閣施餘薰茅茨溥增輝鼎鼎百
年內咄咄七十稀臨流抒我懷新浴振我衣雷雨急生
涼天恩覺淪肌詩來取靜勝句到不吾欺盛服思客位
重鎧念邊陲當暑如懷秋秋至勿興悲

再醺常之

理極終必復孰逃造化機司夏流中氣執衡振嚴威有

懷渴雲霓不願雨珠璣油然起峻增閃若驚霍揮嘉澤
徹中宵涼飈入重扉良苗固懷新冶葉亦生輝從欲天
匪私屢豐古實稀垂老藉香火凌晨肅裳衣百拜屈我
躬萬感銘我肌茲生每有逢末路敢為欺正爾飽丘壑
及此軫疆陲念終抱媿耻已矣徒傷悲

中秋見懷

明月出海底先照彤庭墀正以合德故爭效朝宗馳須
臾散精彩普率揚明輝常時或顯晦所歷隨茫瀾及茲

秋中氣燎然光滿規豈但碧漢澄無復宿霧披如坐水
晶宮更泛碧琉璃凜凜栗膚髮炯炯析毫釐竟欲乘浮
槎試與窮垠涯或擬斫却桂或云生桂枝蟾宮到者折
不生豈不稀玉斧修何事倒即無倒期沉吟自絕倒痛
飲忘傾歌茲辰病因仍良行覺支離始行浮雲多猶欲
一口吹東牀念齋夕妙語寄相思詞到律自協意古趣
更奇今雖減冰輪猶照蘸甲卮寄聲銜南翁斯辰可無
詩我欲資雋永庶以得自頤

侍南軒先生卷雲亭望嶽麓積雪分韻得初作

二字

案此脫去作
字韻詩一首

新元既涉九臘尾春未初司寒勵餘職飛雪來庭除因風
稀復密潛陰慘還舒瑞色入隴麥祥膏潤園蔬未足映
書讀已寬帶經鉏和氣融比屋所積惟林廬悵焉起遐
觀未知問所如南軒笑領客操已敢作疎豈無門下生
不肯升籃輿衝泥按徐轡秀句生寒驢卷雲畢清集湖
山眇開予蜿蜒翠麓中萬瓦參瓊琚急掃供茗事隔江

金人四庫全書
卷一
竟煩渠終日樂未央不為食有魚十韻分九人其一固
閨餘併以屬汰礫敢下馮婦車屯雲方雜沓二白難躊
躇須公專吟筆載賡仍屢書

張時可席上喜雪分韻得水字時予後至周希
稷期而不集

寒威逼重幃皓彩墮庭祀不謂晦日愁乃有豐年喜更
長要深盃客緩愧停已後來固自佳不至猶可紀傳香
共分題索笑驚落紙摩抄玉梅鉗凍合西湖水

次韻黎師侯登王叔武文昌閣看雪

春雪如過客所止留莫住但見空中馳機心逐鷗鷺度
臘凜餘寒同雲忽朝聚乍看鮫泣珠漸覺柳飄絮少馬
有矜色瓊枝鬪玉樹登臨須勝流著我覺形汙北山
鮮明姿愛客急修具坐間兩荊州翛然隱風度更著老
彌明清談屋瓠注客醉主亦歡主醉客即去剥啄鳳沼
來忽得石鼎句便可當畫圖却將醒眼覩

次韻轉庵用山谷半字韻見寄

居閒數相過每語夜參半稍作一日踈已起三秋歎老
去惜光陰歡來猶把玩去年慘袂別轉首搏沙散恍思麋鹿
侶豈是鴛鴦伴拂龜信逢辰聽雞虞失旦冉冉金堦趨
穆穆玉皇案端笏儼一夔曳履儀十亂咸德足享天旅
薦潔初盥疲鴛亦自鞭百駕祇恐緩以茲故山夢纍纍
若珠貫佳句自山來居然起衰悞平生錦繡腸不復置
冰炭室適猶遠思迢迢况閩館加意松柏姿聊逐桑榆
暖歸投玉女壺天當一笑粲

次韻書懷

世味真嚼蠟閒趣覺雋永閉門讀舊書拓牖豁微罔
道忘一斑反身得三省佳人不可招妙處誰與領未則
聊晨門已獻那泣郢向來真左計只合事幽屏感君汪
洋陂洗我榮辱境逢原得新功餘潤及古井筆端有輓
轡句法見馳騁梅花動鄉思霜風吹鬢影言歸日在念
未策心已警咫尺看白雲祇隔馮公嶺

次韻醅徐居厚寺簿

度江見三白飛雪為誰妍因山行畢役憂國且願年春
言靈駕發綿延屬車駢陽侯既効職滕六敢自賢閣陰
不忍下竣事即墮前山林亦縞衣揮灑紛素筵似與孤
臣淚同作珠貝編豈無訪戴舟拘文不容牽感君相料
理語妙堪流涎奈何補天手袖此鑑湖壩不受鄰僧米
顏公合憂煎揆抄映雪眼縱史噏詩肩同時天下名一日
方九遷君不策高足餘子煩後鞭

再用韻

正士如正色恥與俗競妍老成信遲鈍阿婆曾少年斯
人寄閒地宇宙豈贅駢向來馳天壤誰者相愚賢我欲
從之遊每恨不得前茲行本尸祝代庖誤當筵高軒既
枉過妙語亦盈編受施不知報力疾可復牽風雪久為
虐江湖長蛟涎天豈困男兒地闕東南堦惟有皎潔姿
不受寒暑煎勉子加飧飯行行盍仔肩時哉有通塞道
豈隨變遷願將釣竿手一為公執鞭

王弱翁同年以多病故人疏韻五詩為惠次韻

奉酬

王君圭璋姿宜在條理科妙語天發成瑩徹非龔磨宗
廟要琬琰世豈無卞和顧恐太分明頗覺瓦礫多

斯文萬金藥不救俗儒病盧生誰云邪夫子未出正羊
腸駕騎輪鯨瀾汴孤榜噫乎吾道難自古闕衰盛

江水日萬折衮衮望東注飢鳶無停飛不足了雛哺君
看青紫綬但供折腰具物理信如此焉敢辭世故

葉脫秋色靜水落洲渚陳文昌易為月翩翩欲相親蟬

聲老逾夏乍聽意覺新此時酒一尊不可無此人

心競事未已趣了計有餘彭澤八十日便可膏吾車趣
時方枘拙涉世孤舟虛君無攻我短政爾吾太疎

直舍考校次弱翁再用前韻

胷中無渭涇筆下安詮科糊名彊別白朱丹困研磨傳
詩得建安妙畫追永和快讀洗我懷珠璣拾何多

我句蕪陋質聊學捧心病君詩婉孌容毅然色更正唱
歎朱絃音流喝清池榜足亢江西宗它年耳孫盛

官冷得酒錢便欲糟牀注不管門東兒張頤頰咽哺堪
笑布裙婦遮藏備修具君自不紆軫何止傾蓋故
夜讀舉子語戛戛務去陳喚起場屋夢倍覺燈火親科
第計謂了癡兒事方新寄言山內友勿念塵中人
堆案即姑置棲息萬籟餘堦除勃窣行兩脚當我車徑
欲煩客卿相從賦子虛麴生不可招坐令此計踈

轉庵集客分韻得作字見示次韻奉酬

轉庵詩老手久不見近作尚友喜文會分韻得真樂聯

翩來巨軸淋漓想酬酌異味非五鯖良裘豈一貉有如
得良劑居然起深瘼雖微與茲集所得良不薄山王果
為累竹林誠可畧何妨贅賡酬聊復資戲謔永言相忘
友久要欣有託後當不如今今可不悟昨亦欲見真率
正須先宿諾少待天氣涼偉觀灑高閣

轉庵再用作字韻見酬有著蔡休咎之語復韻
為答

步蹇無良行思苦乏新作蟲聲徒自切我病有何樂言

寫紆短懷深汲難遠酌敢嗟鳳兮鳳正慙貉非貉詩家有鑒王同社求句瘼固不相短長祇恐自鄙薄胡為作蟻夢乃欲談豹畧此意誠起懦斯言幾善謔天幸吾已數人生歸有託居然成老醜何者裨畫諾知予與罪子併束春秋閣

案此首次前韻脫去昨字韻二句

次韻滕丞以古風為贄

松柏覆高岡根株滲七澤雪霜有古今柯葉無改易上干青雲霄下庇神龍宅噦噦朝陽鳴杳杳蓬堵跡五色

絢文章八音諧金石羣飛競婆娑爭附第充斥匠石既
罕遇社櫟顧何益伶倫不雌雄嶰竹雜螻蛄藍田驚世
瑞造物等兒劇昨曾闕爛斑今猶眩朱碧居然獲徑寸
幾欲按三尺久之置懷袖尚爾賒跼踖姑憑副墨子往
備庾桑役

陳西老咏檜古風次韻

古井千尺深而無一寸波古檜蔭其旁愔愔長銅柯明
堂一柱難如此櫟棟何匠石久袖手高岑鬱我我天風

一披拂劍佩相戛磨不願為阿房千門貯秦娥願作寒
士庇渠渠共婆婆吁嗟不相貸飛輪迫義和誰歟薦輪
困萬牛未為多

次韻陳大用分韻得對字

離羣易興懷會面即忻對茲豈非人情況復是吾輩稍
稍不晤語翼翼已心憤世態炎復涼畫事素先績餘子
紛砮硃良友抵珍琲仲方真小難賡摩是所愛有作窺
古淡如女洗妝黛亦嘗和宮徵惜不聽環佩是舉終當

了此事可使廢轉庵傳分韻客成憶同載肝膽徒輪囷
醅酢任瑕類

次韻陳大用

林巒迫搖落卉木見槎梗物當各歸根人盡思退省我
今幸投閒日力競俄頃闔戶思寡過出戶忘造請第知
龜藏六大似蛙坎井佳客車枉門好語衷挈領遽發醢
雞覆如脫孤狔窅見道乏新硯導窳昧微縻元方擅能
事轉庵互規警倡醅傳五字翫味消百青盤飧共麤糲

金匱山房詩集 卷一
軒窗臨閭靜恨方厲霜風惜不行
蔗境何當歷
蒼岑相與忘
眇町江山開偉觀
華蓋登絕頂

與同社遊山園次翁常之韻

眷言太玉峯本是仙佛宅
端視儼若屏側晚展如翼洞
府何渺茫傳聞見圖畫
疆理雖東甌題品經謝客
至今味篇咏當時想游歷
顧我本萍泛買隣寓棲息
江山自呈露卉木因種植
鑿巖得泉香拓戶見山色
佳客入庭戶英氣來几席
幽葩芬石根好鳥絃坐側
拄笏山之西

擎舟江以北明月浮可捉
踈星掛堪摘拂晨天宇淨
出海陽烏赤脩嵐爍紫翠
遠目眩朱碧峻嶒雙塔影
突兀
古殿脊媚川溟渤寬絕境
天地窄前賢未嘗亡勝趣
何有極茲時屆清和同社
共推激肯為終日留喜免
重城
隔長歌響林垆妙語出金
石爾汝合忘形拘攣非遠
識
莫嗔驚著汝試問今何夕
曹劉塙可短丘崖肩可拍
却
笑山陰會鬪悲昔人迹喻
指孰非是計馬誰失得明
當
新詩來勿憚難韻迫趣歸
不匆忙餘興猶襞積感君
吐

瓊瑰為我寫胃臆

六月十五日西湖夜泛高炳如集客趙臨安蟠
老致餉同遊者陳可行楊少雲李元德王順伯
何紹彭張宗尹楊氏子弟寺僧方與馬次炳如
韻

西湖著明月萬象各偃伏夙昔湖上遊賡酬動盈束未
有夜泛詩此諾吾屢宿剝啄聞招呼縱史戒行速讀君
紙三過洗我愁萬斛行行正作意在在堪刮目山光真

起予過雨儼新浴精藍憩深幽踈篁庇脩綠棋聲節風
甌參差自成曲睡乍味覺甜語軟氣能馥老僧與客忘
諦紬楞嚴軸小立水花淨一堤良意足方舟曉興動篙
人聽回復薰風散金波心境兩愁獨是中有妙句萬古
無管屬詩家高書記前趙今鮑叔歸來要推敲遣餉到
林谷陳榻初解懸膺門契仍篤不遺太學蕃王楊共高
躅陸笑阿戎談足以侍儿牘支郎更可人啖蔬如啖肉
而我廁髯張形骸愧珠玉敢逃清白眼僅免朱丹轂明

朝軟紅中清遊夢應續未嘆終滯淹湖山已收錄

次韻薛子明由羅浮登富覽

羅浮映掛綵富覽游茲亭地非南海嶠山結北斗城雙
鰲插奔瀾萬峯若屯營往復信潮汐日夜歸滄溟沙漲
陵谷移水落洲渚橫謝客紆目力郭公參地形夫君有
心哉象緯羅中局

次韻薛子明賦雪淵寒瀑

南山阻且秀三峯屹而挺笙跨夜鶴聲松納古潭影珍

潛涵無朕樵涉深及脰星娥閔靈蹤月卿探幽屏同氣
想飛霞相過談倒景儻遇蓮葉舟定自太華井

遊石梁

天柱昔飽觀石梁今創見愧此义材姿空費輪囷薦安
得愚公移往作靈光獻突兀千里間普適寒士願

沈文察院次遊鳳山韻見示再次韻奉酬

短思如枯枿不忘雨露滋一朝得甘霖牙蘂紛差差向

來圯上編

沈文睿惠
詩一編

敢孤老人期至今巾篋中常覺律

呂隨風骨自難蛻寸心恐終違苦語迫應酬如醉多傾
歌擬求風斤斲庶使膠柱移遺以五色篇服之欲生翬
東隅縱已失南車足占迷堂堂易冠老偉論堪扶危不
妨似嫵媚正爾煩逶迤餘事出長技傳玩爭矜持高吟
有催和好雨誠知時疲駕懼難駕渴驥思脫羈行當遂
遠放鴈伴聊同棲

遊道林嶽麓寺

幕府日多暇而無簿書勞喚渡涉湘西鼓柁歌離騷今

日湖南山領覽歸我曹頗覺葉舟穩夷塗自風濤

道林訪幽棲羈懷愜所尚嶽麓振前策盤紆得夷曠向
來北山移無物辭嘲謗見此意豁然泉聲助悲壯

從昔遊山人留題盡名字壁昏暮鴉棲石膩羣鴻戲今
人來更多後觀復長喟吾儕幸聞健拄笏致爽氣
名山喻名理妙處須獨到提耳從百聞豈盡歷歷告茲
遊太清絕足以償宿好相期歲寒安對此松栢操

欽定四庫全書

卷一

欽定四庫全書

涉齋集卷二

宋 許綸 撰

五言古詩

曾主管由宜春道中得遺棄小兒屬予收養道
間寄詩紀實次韻奉酬

日月被八極覆盆自無明陽春嫗萬物孤翰有悲鳴所
以聖明治要燭幽隱情一早出料外誰與填饑坑豪家
亦何心閉糴門忍橫指困寬蒼蒼凜若臨大兵雨餘百

憂洗痛定猶忪怔今代子曾子贊畫外臺清高軒昨過
我絕塵不容瞠歸途出城闌岸許聞啼嬰下車非內交
一念千金輕摩挲脫九死感慨恩更生抱持涉數舍見
我托此嫠再拜敢有渝鞠養專廂榮嗟予何為者世故
亦飽更識君千萬間胸次久已成所飢非一兒公乎勉
功名

魯主管專介取棄兒再次前韻

自別心耿耿奈此秋月明晨興洗我耳鵲鵲枝間鳴踵

門得緘翰中有惻怛情眷彼水際兒感公脫危坑傳之
邑父老相語涕泗橫鄭重煩取將摩挲付老兵忌飽體
未充慣拊心無忤應答已如響炯炯雙眸清試問父母
誰恟怵目屢瞠微公父母恩何以活此嬰兒生未有知
陰報已不輕公猶不自德安得名許生共惟仁聖朝發
政先鰥嫠吾儕值歉乏詎敢孤官榮二星妙宣指悉數
僕屢更三接尚須臾一路當生成況乃幕中畫實負當

世名

來書欲名
以許生

湖上餞沈興國分韻得二字

赤驥見已罕名駒更無值吾鄉推賢侯逢人話詹事訟
簡古風還心清民業遂江山妙主盟景物恆位置如何
柱石姿尚以牧伯寄北關別經年南薰動離思居然軟
紅中見此清白似松筠儼長身雲霄舒直氣寵光竹使
符假借玉階地餉計曾入幕軍容有竝議恭聞天語溫
喜見家學粹它時課最騰看即壘書被今晨欣壽節輕
陰遞涼吹三呼禮云畢一笑天所施榴花染白雲游鯈

芑青芑畫舸得夷猶名園隨造次懷綬却羨君戲彩且
歸侍不繇鴈蕩山即過石門寺永嘉政久成謝公跡重
記剩有名詩章因來寄一二

送蓋總領上計三首

絕代有佳人岑樓碧宮堯即之起幽芬可慕不可招風
雨二十年寒榮聳高標置之白玉堂致主軒與堯胡為
枉襪被江干駕輕輶施物功方成丹砂夜生苗披腹吐
琳琅碧簡趨丹霄

昔者云夙駕楊柳方依依今其望來思兩見秋風吹前
乎已勞還後此亦云歸丹筆映螭坳祥風動紫微豈不
念歸美正爾畏簡書不見居官樂惟憂士卒飢昔人無
遺孔後來補深痼炯炯心獨苦所貴知者希

熠熠飛者螢變化自衰草時至能晶熒翕張合吾道微
光苦不息豈足裨穹昊迢迢風雨夕耿耿祇自保苟無
車先生分合委枯槁乾死誠未悔藥籠資探討

送孫會之縣尉秩滿歸廬陵

人生貴相知不在相逢早廬陵說三孫修名慙諸老伯
也吾同年久別心杲杲季也真可人一見顏色好金石
出几杖握手屢傾倒屈菟雖尚醒賈骨久云槁微君寫
窮愁何以慰懷抱再見一尉更取別何草草回視徒四
壁蟬聲綴吟藁向來雕斲工見輒迹如掃汲深無新泉
送子慚涸潦珍重皎潔姿相期在斯道

送趙倅滿秩東歸分韻得念字

官閒頗成贅習嬾積懷歟古井無復波寒灰豈能燭苟

且信自慙奔競亦良厭學道無新功但覺益友欠夫君
珪璋姿表裏絕瑕玷瓦礫誠可羞溫潤得漸染向來三
語稱吾里懷闕覘名談造根柢高文在鉛槧轉首十五
年天庭久宜拔胡然慰窮愁相逢古天塹治中員外置
縮手靳鞬讙從容國醫旁出語即中砭邂逅秋云滿蕭
條理琴劍炯炯幽者蘭林深守孤艷寧受蕭艾欺忍使
蕢豢僭誰歟功名塗由已拯昏墊小草非遠志臭味真
有忝羞殺東方生飢死更求贍因君動行李令我起歸

念西山有石田努力事耕斂

乞補外出江臯待命泊偉觀二首

經年充拾遺一字無所補豈不懷故鄉念方事新主一朝冒超遷循牆不遑處寧離人間世亦戀行在所有親方賴祿有子方應舉守道在守官奈當事斯語

欲去不得遂正如太廟羊登俎分所宜得去喜可量聖度真如天不妨且翺翔扶老復攜幼遷居大江傍居然得偉觀悵馬渺遐荒潮頭來如山親樂想未央

樓名
偉觀

題解舍壁二首

明時有何遺亦復許掇拾大言得面陳小言可封入有
時効踈愚豈是當務急每蒙天下施聽之恐不及退思
自生慚黃卷常在執舊田雖甚蕪新井尚可汲勉哉競
斯辰萬一如有立

本不事矰弋未免執矢疑客來非不多益友每遠之薰
風時一顧素抱誰與期久要竹居叟談詩能解頤兩頰
貯微笑徑造觀我私請解襜褕衣相與舉近詩

綸子效靖節止酒體賦筠齋余亦和而勉之

綸以筠名齋種筠當掩關愛筠栽竹易見竹知筠難竹
以筠為本筠居竹之間希筠歲寒操追筠古風還筠中
聽瑟瑟筠外瀉潺潺人與筠俱勝筠隨境共閒

重題陳漢卿貧亦好齋

古人重安貧未若貧而樂豈不愛膏粱顧乃嗜藜藿我
聞首陽餓榮名千駟忤况乃陋巷子簞瓢殊不惡刀頭
得幾何蝸角戰方虐以茲悟生理貧中始澹泊陳侯清

時英廊廟宜着脚圭竇勢豈容貪齋意聊託蒼生方飢
渴未可云盤礴且來祿萬鍾脫粟躬自薄

次韻常之松廬有感

年少愛節序老大感歲時亦知夜漏短自喜晝景遲懷
人笏頻拄矯首帽屢敝至情何慘愴同氣相因依君家
說大難心胷緼多奇永歡思伐木長歌倚式微眷言無
鴈地渴想前鴻俱一別如昨日二年忽今茲數傳龜組
解備著鱸風詞寒鄉少瑞應遠覽期長離解纜辭江臯

反袂接水湄無從猶出涕有弟應垂洟今見松廬作可
勝薤露悲憐君抱苦節愛兄見哀詩無復逝水向當有
高山知老慙無領解久約同襟期勉和吹簫章聊慰深
長思

周時仲提幹求二親墓亭扁答以攀栢因為著
語

掃松拜親墓攀栢念親泣栢露滴兒衣兒淚和露濕五
鼎從可陳三釜嗟何及墳前白頸鴉終日聲楂楂

跋宋朝老再和陶淵明歸去來辭

吾鄉說三宋伯也抱奇偉太學三十年不作舉子語晚
當拜特恩青衫送還官開口論世事有舌不可捫吾皇
開壽域汪濊澤萬國勉公俯而就如女有正色翻然感
際會千載今一時誰歟俾宿留再和歸來辭淵明歸有
田公歸徒四壁姑奉祝融祠勝煮南山石公乎未得第
我輩慙登科空殮了無補奈此歸來何

次韻題吳無過所藏張無垢難老堂詩軸

養親感卧冰慕親悲履霜眷茲母孫情胚胎炳前光先
生一獎勵吳氏增激昂至今諸孫行如立嚴師傍躬行
斯入室言辭特濫觴當時五子名佩服詎可忘省也滋
拳拳何止升其堂

次韻廖端叟求墨

憶昨同舍時愛子志尚堅研窮非口耳點勘分烏焉讀
聲鏘金石筆思湧漪連合并幾寒暑分散如雲煙家雖才
咫尺見且無資緣甥館聞徙居我屋欣接椽乃以隨吏

鞅而歎抱遺編嗟哉燕鴻隔漫爾夔蛟憐三年閱黃榜
萬選遺青錢祇擅文場聲不上吏部銓儒冠未為誤洛
誦方流傳夏果煩送似唐律仍燦然為墨貽古作如珠
出深淵書生均老醜嗜好相後先亦有大禹圭未許蒲
氏賢何惜遺久交相得真忘年久知鐵為研更以心自
鞭矧古傳毛穎端合遺陳玄落筆看餘萬斗酒須十千
雖無蘭亭繭願助韋郎牋古今一俛仰人墨相磨研有
無要相通唱和聊成篇我今闢三徑門開西一偏已過

中秋月皆為晚涼天何妨對花下取笑同樽前第慙葵
衛足欲愈猶聯拳

次韻德友惠黃雀

興來把酒杯徑欲連臺拗聊用資吟哦豈謂貪醉飽晨
起秋思清茶罷詩腸攪筠齋佇遠思詩筍馳速巧餉我
晚田雀如鷹初脫爪惠我長城句如棟畧無撓雀命雖
甚微飢驅亦良撓何異不農耕而乃竊祿稍哦詩思陶
謝論交懷管鮑只消寄詩篇斷不厭煎炒

再次大用韻賦梅花

暖律回枯荻春陽發寒梗梅根有特操花事每先省分
苗本十洲孕玉可千頃松篁納深交桃李絕竒請冬居
姑射山下蔭太華井幽棲有心賞巡簷常笑領相對各
忘言豈但無機穽詩雖道未尊技可造經綮孤標固洗
凡累句自無警轉庵詩家醫妙劑即甦青元方詩家禪
默參惟打靜欲離香色想恐墮人我境昨夜來朔風吹
香過南町小解作淺語醞醕欣灌頂

再次轉庵用梗字韻賦梅

見梅思洛陽何愁道路梗見雪憶灞橋便可心思省仙
家種玉成造化炊梁頃凜然孤高標敢以塵溷請將軍
有傳令遽成臨渴井王言惟作命盍作和羹領香色歸
本根滋味豈機穽自非泯全牛安得試嘗縈轉庵句中
畫梅詩言外警難韻有轆轤妙語壓留青昨夜垂垂雨
一洗娟娟靜便覺容成圃真是太玉境朝來知見香墮
在區別町不如兩忘言搔首孤山頂

園丁以菊為屏為船轉庵竹院諦賞不足分題

得塔字

眷彼東籬花忽作西靈塔又如船子泛復似南屏闔園
翁起童心須彌欣芥納分題要鏗鏘飲秋振蕭颯我合
浮屠尖工須畫溪罨崕增玉崔嵬團欒金匱匝儼然香
色俱間彼青黃雜天成具體相人事因假合願修衣裓
供用作布地跼那將有漏身久實無縫合轉庵曹着語
竹院嘗掛搭我有一句子無問亦無答

德友惠竹栽甚富而又得佳篇既種復喜雨次
韻謝之

嗜酒愛風竹種竹消日醉小園窘邊幅雜芳紛位置此
君何可無野卉闢之易畝許得滋曠千箇栽不翅故人
雖借居愛竹有幽致肯割鍾山青分植容成地移來天
亦喜涼生雨無值既免躬抱甕何惜親閱視颯爽已可
人能同聽秋思

轉庵觀趙十一聖花

有藝者趙生雜出逞活法飛走異族類指教各馴狎參
戲竿欲摧險弄首將壓當場等嬉笑旁觀舉震雪其間
聖花術殆是天下甲出沒鬼物驚變幻風雨霎靦面喚
名葩信手如素插洞視空樊籠赤立卻巾恰居然齟齬
兒恍出虎兇桺脫索婦更神倒錐目不眨穿楊百步間
設的兩口夾一箭中關捩四坐駭汗洽或馳若轉輪或
舞若揮箴機緘孰主張造化在噓呶技進無萬殊妙用
纔一指儻然自胡越誰能會鄔邴

次轉庵聖花韻

轉庵詩三昧仍嗜書八法寫出金彈句可翫不可狎近
觀聖花作險若君獨壓壯如錢塘潮清若苕溪雪僚九
同妙手病蜩真脫甲庖刀方奏暑郢風復運霎文章特
小技聖處奚假插得趣堪獻佛高陰岸烏恰達者越拘
攣迷者泥檢押豈知造化機目擊不容眨衮衮萬馬奔
翼翼兩攻夾靈根有變通時雨自決洽意輕秦趙壁價
重蒲葵簞記舟何用痕印錢偶因搯於道得達尊問鼎

不問邨

案此首亦次前韻原本脫去呬字韻二句

范武子輓詞

嗚呼吾武子天乎奪何速
瀟灑錦繡腸秀潤琅玕腹
出口論世事好語驚拙目
孝友式里閭急難駭僮僕
襄於建業都共厄主人屬
但不同姓氏何翅如手足
一日不晤對尺簡頻往復
中夜懷清姿有夢墮脩竹
時予悼伉儷感爾念鰥獨
別去幾歲華亦聞悲壺俶
同病心相憐異縣情愈篤
我欲託以妹子不鄙其族
兩窮忽相值一

家有餘睦去作建安縣振彼七閩俗豈不化彊梗元不
用鞭扑邑人歌載途當路薦聯牘彼守何堅忍於民能
迫促二年甘不考百謫寧忍辱子方困吏鞅妹忽淪鬼
錄入戶悲方纏出門濕如束駿足不受羈鹽車宜折軸
訃來忽收書痛甚不容讀未令吾母知可聞爾母哭人
生會有終汝死寃乎毒吁嗟先大夫艱難脫荒服衣鉢
自桐鄉生涯去已蜀清德誠可種石田不能粟爾母今
在堂何以供水菽爾弟獨當戶何以資耕築三兒須教

訓一女待鞠育自愧貧多累未能分薄祿近擬乞州麾
因用致家塾此願未吾遂有身莫渠贖所居讀書岩旁
依紫邏曲憶昔曾同登相期共結屋今晨何為者昨夢
不可續平生樂哉丘終焉埋此玉雖遣奠芻陳不及墓
草宿嗚呼吾武子臨風淚盈掬

欽定四庫全書

涉齋集卷三

宋 許綸 撰

七言古詩

應致遠以百韻古詩見示推許過當病中姑借

放翁韻奉酬

我詩何敢希楊公况復進之陸放翁煩君妙語相縱臾
控地豈得追培風兩翁齊名家異縣歎惜餘年能幾見
斯人不上甘泉班我輩先之覩顏面君到靈山親得語

切莫提撕落言句恨君相見一年遲不同薊北燕南路

胡伯暉有詩訓豚犬輩次韻以廣其意

金風著幕驚新秋銀河搖落光飛浮天籟既息蟲聲啾
書生白髮不解愁挑燈夜誦疾於流人生在勤業箕裘
少不努力進厥修老將噬臍孰怨尤悠悠天壤卑微休
安得獨歎命不猶昔人忘食兼忘憂何適非學息與遊
道不敢徑川不游朝喏暮諷夜校讐至理漸漬如膏油
好處心會非力求不特祗為科第謀正使積書如鄴侯

手尚不觸讀豈周張口雲霧正自羞學與不學人焉庾
汝曹曾念及此不賢師學到無全牛乃翁為汝相延留
一官為援乏虺螭欲餬汝口違松楸敢辭折腰向督郵
賦歸無地堪耕收勉旃汲古到索丘困來時復揩雙眸

次德友韻

憶昨得君和陶詩牀頭細讀人謂癡二南固自立牆面
十駕亦欲鞭駑疲退慙作吏了無補正使得句安能奇
有時拈筆弄紙墨大似臨敵收槍旗投老且願共詩社

鬪健聊欲為兒嬉恨子寓舍苦迢遞有僧借屋無奔馳
乞米不須煩送似無儲自足常宴如轉庵與為方外舊
僕也何翅管中窺豈有脩竹真可欵曷不宿霧及早披
來詩賡酬特未已追逐登臨隨所之

得趙昌甫詩集轉呈轉庵却以謝夢得詩見示
有詩次韻

我饒嗜詩欣染指但見其長有誰毀早年游方識趙謝
如魯逢掖宋章甫謝詩瀾翻豪且古趙句清癯澹而苦

學力到後成一家渠自不知為孰使天各一方費渴思
想見永增寒似水居然老手斫方圓出戶中規還中矩
轉庵活法已參遍何止得心仍得髓我如無寶窮波斯
望著是珍先自喜忽得趙璧急呈似示以謝草如寄取
自憐老去無長進努力啗噉訓兒子

再次轉庵韻

能詩何殊臂使指得句不愁人背毀詩何緣瘦道自肥
誰嘲飯顆山前甫誓不驚人死不休言是良工心獨苦

驪黃牝牡元不問智詐勇貪俱可使合時端如錐畫沙
悟處快於瓠建水趙詩平澹謝奇古所以吾儕誇絜矩
轉庵更是可憐人詩眼既高窺字髓我生何能補一字
君美非溢私兩喜更須傳抄及同社定不驚嗟斯是取
騷壇摩壘真幾人安能碌碌數餘子

次韻才叔分韻得七字

竹院主人新築室涓吉上梁辰取乙鴒工度材合忙冗
分韻題詩能暇逸獨憐久不到容成片語全無課秋律

自傷病足轉拘攣不復拋磚為倡率轉庵忽傳七字作
頓埽陳言洗凡質剩喜金風入詩思定挽銀河洗塗筆
鼓宮宮動妙入神上鑿鑿國愈吾疾聯翩急埽煩寄似
已負今年七月七

次陳伯壽分韻得者字

南浦家庖亦烟火何事胃中太瀟灑少提筆力老更堅
不信昏金徒巧瓦一官姑混錄錄中三生豈是悠悠者
秋鐙夜課阿戎讀高築詩壇潔蓮社人傳繡口仍錦心

我詫瓊杯并玉笋阿戎官學兩俱長金固在鎔非躍冶
轉庵忽傳分韻作咳唾珠璣來筆下挽回巫峽使倒流
快注銀河見高瀉敢陪驛騎策疲駑絕喜風檣追陣馬
愛詩未足老猶貪染指更嘗猶靳舍祇慙狗尾聊續貂
安得曲終成奏雅嗟未了忽開予擬約憑高共紆寫

次轉菴用坡公韻併簡洪樗野

短日驅馳駒一罇百刻六旬分卜夜殘年餘力秉燭吟
所冀二中并四下敢多奇疾希盧扁祇是寒溫隨補瀉

轉庵著眼從昔高伯仲古人相匹亞細噉纖巧天許覲
硬語峻嶒神所借竄曰已脫卑晉宋真淳更擬出陶謝
近驚樗野輕千里遠自鄱陽踰百舍舉似詩家說中蜜
更引禪宗談倒蔗老父病後已云怯餘子聽詩應轉怕
那令勉繼坡公韻預恐難逃灌夫罵

送蔡駿叟往金陵見留守李尚書

蔡郎百戰吞賢關彤庭射策誰其班桂枝第一幾得攀
一官去糾蜚與蠻留臺友第李孟間吟詩遠過陳後

山使覓仙山大藥還歸來五色應爛斑因聲為語大匠
般君何不來予汗顏

邵廷評供職未閱月乞為淮南檢法官以歸賦
長句見志次韻為餞

聖朝亦知賤士醜尚許追隨牛馬走圜空幸免殫拙心
材散那能呈好手萬里來歸塵撲面一夢驚回柳生肘
同僚未至得斯人眼底輪囷曾有否青雲直上氣如虹
要津立登槎犯斗惠文安得事仁堯吏酷自應嗤小苟

相從幾何突未黔掉頭歸去依巖藪拄笏聊看罨畫山
岸巾且飲淮南酒夫君自是皎潔姿不用滄浪濯纓垢
正恐功名自逼人更向王畿重結綬

送趙推官持檄之興國

趙君派自天源來細考衡茅無此才文章決科特餘事
幕府官業何壯哉論事不愁開口屢直道馳驅羞詭遇
尺伸如可寸枉施寧脫青衫故園去宗廟之寶森瓊璫
諸公爭欲出我門極知胃中有定力未肯叱馭隨王尊

楚狂涼涼莫宜世一笑相逢有初契尊酒論文情益親
但不同姓實兄弟文昌堂前汝水東萬頃煙雨時濛濛
向來簇坐覓新句多少行人圖畫中君今胡為事行李
著身翻在圖畫裏捧檄王事不可遲何況堂中老親喜
喜君問道康廬旁過家上冢還不妨再拜松楸有心事
孟母卜鄰今更良了却癡兒紛案牘回首廬山真面目
喚起三年夢中意想見詩成清可掬

崧高行上周密使壽

銀潢快瀉天無聲秋光漾出圓蟾明玉闕晏眠析不驚
籌帷坐見萬里情健兒飽食細柳營猛將思奮撫劍鳴
摘試一二來帝京表裏百萬皆精兵此時崧嶽風更清
壽酒消得如澗傾天子神武恢八紘一賢制難真長城
鴻鈞對韓三階平珠連五緯薦璣衡天開地闢霖雨成
中書之考遠作程回視萬卷紛拏撐一編自足垂勲名
書生腦脂昧短檠莫耶挂壁吼長鯨相公辦取崧高行
不惜攜之上崢嶸

崧高齊上施參政壽

靈山鍾秀崧高齊鹿苑名勝神所棲水晶玉札銀成泥
無論粉綠丹黃鬻文星相望直斗奎出藩入從黃金閨
誰坐廊廟賡鳬鷖山經地志古有稽我公間氣今其繫
資兼文武雙印提十年太學甘朝齏吐光萬丈騰虹霓
鷄林傳誦爭航梯至今威名讐羌氏張旃朔庭撫遺黎
鼓舞雄豪泣旄齟折衝樽俎眠鼓輦屯雲萬里行春犂
五風十雨無苦淒此疆爾界誰町畦不須京觀封鯨鯢

混一少忍矜扶藜從容論道開端倪一語折衷溫如綈
鑒裁不閱黃輿驪流品自成桃李蹊琴音八極回薰兮
長庚夜明玉繩低韶璫曉馳建章西黃封九醞天處題
壽以一飲千玻瓈公開壽域民同躋龜文燕頤額插犀
中書之考米一秭葛仙煉丹舊有溪從公擬欲求刀圭
散作人間刮膜篋盡洗凡骨開塵迷

雲龍歌上周丞相壽

萬化袞袞相乘除循環甲子如數珠甲子既周理當復

豈有潤澤翻焦枯丞相補天祇袞職閔雨憂民見顏色
雲龍契合此其時能費天工幾多力明當月色圓如秋
書生徙倚生暮愁欲攀斗柄酌河漢一滴變化為萬流
憶得去年曾拜月此日團圓仍皎潔極知有藥自長生
更願長圓渾不缺今年拜月去年同却欲屏翳驅雲蒙
久占月角如張弓兩月少雨惟多風昨夜占星忽離畢
定自滂沱翻手疾今朝四郊已沾濡丞相明朝是生日
書生喜極欲起舞急買香茅葺庭宇公不見崧嶽降神

生甫申山川出雲作時雨

上南軒先生壽

岷峨一綫江濫觴意行萬里無留藏五湖洞庭洑熊湘
衡嶽巋然鎖其旁離堆砥柱屹相望湍流橫潰不得狂
挽回斷港濟絕航一齊衆楚勢莫當三芝五餌別有方
狂簡痼疾瀆膏肓天遣奔波赴洄湟回視坎井足跳梁
三浴薰之驚望洋一語咽口成周章昨夜太白垂光芒
皎然松柏凌雪霜向來十襲一瓣香再拜斯文壽無央

願回帝力超羲皇無懷大庭還我鄉

次韻何起巖喜雨

龜坼高田畦渴雨何取尸臣守茲土抽毫擢髮控深衷
羽衣拜章夜當午天門岌嵒洞九重玉几哀矜迺三拊
守臣有罪固合誅農夫在勤亦良苦去年旱荒有積倉
今年饑歉將空庾通宵灑潤祇若絲明發屯雲儼安堵
初驚大點來莫當俄即翻盆流孰禦舊雨相過憶去年
坐眎排簷亦如許我慙歷歷洗心源君喜津津見眉宇

瑰章傑句助歡呼
石燕商羊俱鼓舞
急須似吸舉深杯
莫負如澠寫甘澍

次徐漕韻賀留守劉觀文禱雪感應

雪霜之忍有至慈
一片到地五穀滋
所以臘中重三白
史譏失時書直辭
我公卧護北門北
百姓愛公如愛日
及冬禱雪乃愛民
若有鬼神宜率職
要晴要雨天必從
玉山何獨悶燭龍
一夜風師擘冰絮
坐使東國成雪宮
曉起清愁無復有
如在春風飲醇酒
欲歌零雨勞公歸

正爾補天須妙手

再次韻呈徐漕

留臺心與天等慈違春覓雪回象滋計臺心與留臺似
賀版趣遣瓊瑰辭白戰場前受降北筆補造化戈却日
郢中之曲信寡和鼓宮宮動能者職我欲十駕期相從
今見老子其猶龍徑須乞公玉藥珮去上絕頂瑤臺宮
下視塵寰一何有天地交光落吾酒酌公雲夢公莫辭
能費公吟幾义手

次韻程判院喜雪

帝心端與天心合，務本先農斥浮末。
冬溫禱雪響交孚，急霰先聲如撒潑。
獻花女兒弄璿璣，翦裁楚水煩湘妃。
東郭先生不敢出，南枝烏鵲空驚飛。
高卧從教深沒屋，此是天工真雨粟。
但願四海大有年，無田可耕寧已獨。
詩翁愛日親年高，時時夢裏見三刀。
男兒盍洎千鍾養，蹴踏起舞聽鷄號。
勲業欺人頭易雪，化工於汝難私變。
滿酌長歌白雪吟，下里陽春詎有別。

雪再作山甫約遊雨花臺不遂聞與諸公登鳳
凰臺次韻送似

騷屑寒威逼重幕衲被蒙頭慵蚤作不知一夜雪花飛
但訝五更風力惡摩挲病眼試憑陵把翫清詩何灑落
好語自足驅瘡癘嘉祥况乃銷離瘼絕憐冰筴墮脩簷
撥觸風琴響朱箔一冬溫煖憂麥蠶萬事乘除等鳬鶴
為言三鳳今河東曾約連騶出南郭山陰舟回雖興盡
巫峽雲歸終倖薄方疑再往成渺茫已拉羣公湖寥邈

九萬扶搖不可希隨分榆枋吾亦樂

次韻蘇伯茂立春日雪

從事青州初入幕子墨梁園新有作春工試手欲成妍
滕六蜚英良不惡初看到地潤却無旋喜積威乾更落
鋪簷幕砌遍匿瑕壓瘴埋蝗廣求瘼藍田種玉夜生苗
吳娃擘繭朝盈箔認巢無處疑昏鷁斂翅有蹤驚瘦鶴
一庭柳絮漾東風千樹梨花醉西郭犯寒覓句覺詩清
賈勇行杯疑酒薄頗煩造物相料理頓使幽懷渺綿邈

回看稚子失啼飢想見田家爾應樂

登偉觀因誦老杜道林嶽麓詩用其韻

立秋三日天氣殊涼風渺渺舒鬱紆
少日第挂西山笏暇時惟汎會昌湖
投老身登華蓋頂度堂面直蓮峯鑪
長江回抱若褰玉明月蕩漾如懷珠
楠溪大源小源出樟浦早潮晚潮俱
凌空筆架呈掛綵出海金輪看浴烏
中川蚌胎非嫵媚港口螺浮疑虛無
何以得此江山偉若有相者神明扶
了知無一可云補其敢有二當何誅

故人相逢笑顛錯生涯不解先膏腴且同野叟共爾汝
免以前銜相喚呼看山未覺迷老眼報國終媿全微軀
斫竹特為三益徑把釣勸作扁舟圖乃知絕境真妙絕
強名孤嶼何嘗孤凭欄聊欲須欸欸飛帆正爾來于于
明朝此興定不淺但恐勞苦肩輿夫

雅師求閣名既為作扁榜仍賦娛客雜句


妙景非聲亦非色非色豈應容粉飾東坡妙用徧虛空
大地山河等兒劇簡齋有句添蛇足雨抹晴粧要娛客

黃妃塔邊淨相寺破屋荆榛十年事雅師辦得一片心
化出寶坊全體備傑閣巍巍尊大士我欲名之無盡意
更拈蛇足扁東偏與師餉客為客地東坡仙去可無詩
客來了此一段奇未雨未晴煩舉似非鬼非仙竟是誰

王宣甫求崇齋扁榜仍索詩轉庵之作先成即
次韻為寄

聖門教人亦多術由也升堂未入室顏雖在寢猶仰高
火就水流隨燥濕但見終日不違愚豈知庶幾介如石

陶溪昨以崇名齋欲予隸古詩記實今晨忽見轉庵作
名與詩高同起日崇齋少學用心苦晚乃一掃科舉習
霜降自然知水落道損都忘為學益一從崇卑悟師說
心已沈酣全體易書扁外和轉庵詩不待形容有潤色
憶昨尊公期類予似我顓愚有何獲老慙才衰惟鈍遲
感君肯赴同襟期閉關卻埽門植榆不妨倡和來壠簾



欽定四庫全書

集部

涉齋集卷四
六

詳校官庶吉士臣吳烜

主事_臣呂雲棟覆勘

膳錄監生_臣雷琳
膳錄監生_臣任濟

欽定四庫全書

涉齋集卷四

宋 許綸 撰

七言古詩

次韻轉庵讀中興碑

千秋金鏡唐元龜
苞桑鏡見龜灼知
女主為禍已云慘
天寶之亂尤危疑
九齡早悟綢繆詩
其奈哥奴基棼絲
外人何得與家事
旋聞潛納河洲睢
席誇祿兒李裴和
助桀為虐幾乘危
趣之使亂果為誰
張巡廟哭祗涕垂

高將軍固非遠慮掉頭肯和金刀篋四鎮休罪高仙芝
張垪早措平章辭望賢宮中例忍飢金刀胡餅方効奇
事有至難已言之賊心包藏久竊窺春秋知我盡罪我
監國引嫌孰維持顏筆勁節霜筠似元文秋月華星如

次韻袁尚書同年巫山之什

我本山澤之臞姿出處相較黠與癡生當浙東巖壑地
閒覺壺中光景遲井蛙敢從海若語鴈蕩斷謂天下奇
一從天柱想突兀便覺屏幃排參差盍歸乎來歸未得

今吾非故吾何之南官祝融常在望北征太行長相隨
幾欲拓開令混一雖媿力乏猶忘疲故人將指鎮巴蜀
大江揚舲張虹旗經行先須實古錦及境方要塞赤帷
陽侯似知公得句吳榜自舞山折枝有客忽傳巫山高
長安不復紙價低陽臺從昔誇詞賦大夫無乃姑戲嬉
山川合因雲雨祀神明何得褻瀆為牽牛織女誇自古
小姑彭郎說一時三復新詩有如此盡洗遺恨從今茲
蜀道雖云在天上政譽已逐詩聲馳世情嚮背南北阮

人物好醜東西施願君滄溟恢宇量聽彼鉅矐居井湄
已為下戶蠲逋賦更要全蜀俱信眉長安父老久延頸
關外饒餽寬張頤寂寞恐有玄尚白留落得無素染緇
規撫久矣欣濟濟民俗定爾臻嘻嘻公歸得政公何疑
勿為風月鑄峨眉歸來要續晤溪頌已賦中和宣布詩
聽劉念九丈二姬歌所和醉時歌明日亦次韻
送似時已三鼓

邊頭幕府文書省功名之心灰似冷老去英雄髀生肉

功名之心死未足中原有土尚淪金中原有民惟戴宋
天開地闢會有日竹頭木屑寧無用男兒信命人見嗤
命輕於山重於絲未肯身同草木腐徑欲名與天壤期
行藏我何有交友勿復疑躬行即吾道歸求有餘師和
氣沖融自斟酌榮枯不逐花開落物理天時信有終雲
雖出岫終歸壑未須高卧百尺樓未須緊束春秋閣夫
子適去還適來無波古井生青苔我獨不歸何為哉渴
心已覺飛黃埃長鯨未騎且捫蝨不妨隨意芬浮杯

田家秋日詞

晚禾未割雲樣黃
蕎麥花開雪能白
田家秋日勝春時
原隰高低分景色
寒栗挂籬實累累
角田已收枯豆莢
芋魁切玉和作糜
香過隣牆滑流匙
牧童牧童罷吹笛
領牛下山急歸喫
菜本未移麥未種
爾與耕牛閒未得

晚田黃雀詞

黃雀不知來處所
或云海化或蟄土
秋至晚田拾禾黍
投身不知入罔罟
十中八九不計數
黃雀之死孰憐汝

汝不如搏穀并布穀又不能快活催麥熟農夫辛苦耕
無功食其祿無功尚可那無厭腹飽果然猶不足嗚呼
一年三百六十日常時安在今時出安得山間野穀生
石田與汝飽死終天年黃色雀還可憐

次韻陳伯壽食黃雀有感

嗟哉黃雀力命微譬彼食言安能肥乃欲身與天壤期
沕糝造化闕絨機以時啓蟄安居卑蟄久啓晚見者稀
不耕而食乘三時晚禾欲熟堆農扉就田恣啄充久飢

來時千百漫天飛，惟欲蔽翳朝陽晞。似雨霏微疑復非。

此時得計壓稻枝，腹飽果然不思歸。

案下一首次韻酬轉庵此下尚有肌

此一韻此脫去

豈知時與命相違，投身入網分所宜。鷄肋猶怯

尊拳，揮汝輩么麼將安之。螟螣害稼古實譏，嗟哉黃雀

全無知，大似爍火凌朝暉。炙之醢之爭稱奇，誰念物命

聊依依。黃雀何責復何悲，夷齊餓采西山薇。不爾吸風

何活，為顏子簞食其庶幾。祇令瓢飲將誰欺，霜露舒慘

相思。威螳蟬小大遂點癡，人為物靈賢則希。比物醜類

姑釋疑螽斯豈得比后妃鈞之三成君父師法當授命
寧避危有益於國身何虧我欲與雀排重圍

次韻酬轉庵

南浦太丘潛少微非隱非吏嘉遁肥轉庵相與菊花期
黃雀乃得詩發機詩則高矣物甚卑物惟所遇知音稀
黃雀幸甚逢斯時菊因東籬桃左扉啗成雖佳不療飢
黃雀頭顱萬里飛兩語如露蒙晨晞後人往往悟昨非
轉庵識破花拈枝勘遍諸方漳南歸愛詩愛字淪膚肌

知我愈覺成相違同病亦謂投閒宜老婆心切一手揮
長篇險韻鑄出之涉齋自訟識評去聲譏不待見聞方覺
知覆盆一旦遭赫暉平生此段誠大奇願言稽首長歸
依為能忍辱偏慈悲東山久別思薔薇生處放熟非過
為豈須囿圉才見幾寧受校人當面欺詩壇受降曾怖
威牀頭置易甘成癡雖匪顏徒竊願希今見菊花更不
疑牽聯黃雀為匹妃作配字南浦柏梁一字師轉庵撥動
闌楸危琴鼓不鼓無成虧前言戲解小郎圍

德久送沙喫信筆為謝

海物惟錯羣分命並海饒涎為物病采拾烹煮如撿蔬
豈念含靈鈞物性就中水母為最蠢以蝦作眼資汲引
蝦入罔罟自不知水母浮悠亦良窘其間墨魚工吐墨
以墨自蔽潮水黑潮來舟人如拾塊販者填街賣烏賊
沙喫喫沙巧藏身伸縮自如故納新穴居浮沫兒童識
採取索索如有神鈞之並海無所聞吾鄉專美獨擅羣
外脆中膏美無度調之滑甘至芳辛年來都下為鱸膾

獨此相忘最云久轉庵何自得此奇惠我百輩急呼酒
人生有欲被舌瞞齒亦有好難具論忻茲脆美一餉許
懺悔未已滋念根擬問轉庵所從得訪尋不惜百金直
豈非近悟聖化詩望茲尤物令人識綠衣在旁忽覲然
蠅蚋取笑却可憐

再用韻謝德久見和

人為物靈鈞受命物本於人無詬病聖遠庖厨存此心
詩詠蟲魚明物性沙隄入詠誠蠢蠢因之演雅聊援引

此輩已分泥塗辱吾儕忍加湯火窘烏郎自烏墨魚墨
如蝨處髮不知黑鎖管寄車墨者流書契豈皆能作賊
牡蠣分房巧比身雉蛤移種陳接新螳君孕玉自撐拄
蠃氏采月為精神西施有古話前聞老婆之牙豈同羣
螯屬黃中膏具美螺族青出味作辛蜺蛭蚶蛤殼為圉
相濡以沫期耐久自為鍋釜使受烹寧落提攜死於酒
子產校人從肆瞞流水長者功難論寄聲海上釣鰲客
鰲動恐傷大地根滿船月明何所得意不在魚鉤自直

潮來忽見駕山來箇解吞舟人不識有客聞之為駭然
人魚更擅將誰憐

次韻監簿弟惠烏髭藥有詩

漆城容可為蔭室髮白何由黑於漆但聞拔白成斑句
安得反老還童術嗟予同氣仍同心憐我年侵雪更侵
爾年少我尚餘紀我髮縱禿當投簪頂如赤壺已無二
君有良方誠已試正使緇鬢猶能華未免種鬚逢見戲
我髮非病心合醫心白髮白無已時欲將心來煩汝黑

且圖百問百不知

再次韻酬答

弟官辟廬隣藏室膚如凝脂眼如漆人言自是仙中人
何乃反求還白術少年苦學知苦心心為髮根宜早侵
黑間見白猶堪鑷白既還短難勝簪我老閉門師不二
病足攣拳百藥試草玄尚白從容嘲攄尾奮鱗任賓戲
我聞醫國為上醫子方誠良盍濟時百二之名穀函固
誰與問津君當知

楊似勲許惠丹砂

雙爐炯炯朱成碧兩鬢星星玄尚白丹砂入地長黃芽
蒼顏幻得嬰兒色了知色相無定形造化於人亦兒劇
蓬萊三山何渺茫內景黃庭猶準的懷璧其罪彼何辜
資盜以糧渠自賊西州九轉得奇功媿我聞名未曾識
小人有母垂八十步履輕便自疇昔今年一病起衰容
分明只得丹砂力九頓首拜三歎息什襲藏之願無數
日引月長餘幾何神奪鬼偷疑暗擲間者從公有天相

啓闕抽關話奇特便祈公賜公許之歸語老親感填臆
膝行欲請還淑踏盛事不應相趣迫三沐三熏課長句
句豈能神公自德

楊丈既惠丹砂數種再用韻敬酬

鵲鵲飛來動林碧喜聲楂楂鷄鷄白宗伯憐予反哺情
遣贈金丹光五色先生上醫已醫國敵國長城賢季劇
胃次經綸有準繩壺中消息有端的地行在在即神仙
世上營營自蝨賊一編黃石豈容窺九籥丹經應默識

未許騎鯨游汗漫已約據龜論夙昔嗟予聞道了無功
粗識事親惟竭力苦乏大藥從人覓數溷寧能無厭數
先生樂施微少靳變化丹砂猶米擲得隴望蜀安敢料
和章更枉珪璋特名臣奏議得精本併與寒窗資省臆
有親可娛書可讀歸養可期非怵迫媿無好語疇少分
昨夜春官長陰德

以端研送鄭景元同年

貴公寶研如寶璧書生摩墨但摩石有文無研正不妨

有研無文亦堪惜漸老祇愁才力盡片歛拳端寧不靳
吾家面樣什襲珍色如馬肝膚理潤昔言眼為石之病
此論不公吾有證星辰在天珠在淵此石晴光鸛鵒瑩
文字之祥吾敢顓鄭侯一見心拳拳百年石交吾與汝
更有甚者吾當捐兒曹旁觀俱唧唧兒曹莫癡翁豈失
鄭侯自有無價珍持獻於人吾惴慄願侯珍研如所有
少時光芒須逼斗會看落筆中書堂却試玉堂揮翰手
又次韻轉庵用食黃雀韻贊歎鄧長孺曩得予

端研鄧為轉庵甥方在疚

論研當考石精微觀人豈計體瘠肥歟溪入浙無淹期
刷絲羅紋如出機比並端坑終品卑就中古端見尤稀
難得已歎承平時長繩束腰下巖扉宿糧腰畔不揀飢
鑿深泉眼迸若飛浸淫竟日無光晞輕生重石不悟非
石工傳業猶孫枝我售古璞千金歸璞雖云石玉為肌
信手得墨無拒違事忙行草取次宜才衰筆老無發揮
頃見鄧友輟贈之質粹材美不可譏契家有子吾所知

文章光焰期騰暉不妨怪怪仍奇奇酷似牢之惟舅依
嗟嗟尚怵霜露悲循陔自苦躬采薇讀禮以外將胡為
力學報親其殆幾案食黃雀韻此下尚有欺字咸字二韻今脫去學非有厭書
非癡有志於上皆可希彤庭對策決大疑制草說命周
南妃玉堂從容有餘師古來孽子操心危勉旃無令一
簣虧萬釘要看黃金圍

馴熊嘆

獸名曰熊本逸才嗇夫教之馴若孩開檻當街作險戲

尋橈旋筵能千回負戴躑踖時貼睽忽然逸出渠亦敢
嗇夫當之作人立嗟爾勇氣終坎壈問云初教本無法
祇是豚蹄趨飢乏說似連營飽食人努力邊頭厲戈甲

射鷹行

聖作桑弧男子志矢人傷人豈吾事五陵少年狹斜遊
柘彈金丸矜聖鼻一朝折節臂良弓腰身不動馬如風
背彎團月無留意禿鶻老鷹應弦墜書生忍飢猶努力
夜夜孤燈腕寒石等閒拓手石五餘真是無心事書策

詩書豈不關時須寄語悠悠年少兒一鷹一兔尋常事
正要尺箠鞭羗夷

憫牛行

牢牛得肉那忍喫匪論陽報談陰德憶牛初生成犢時
隨母耕田眼先識繭粟漸長初勝犂脫軛項間染能赤
一行錯誤隨後鞭習得犂行如界直耕來耕去禾稻成
得閒放食行田塍稻秫掠嘴不敢食自齧枯草甘如飴
馬終蒙帷犬蒙蓋牛豈無功遭橫害

昇石行

沙河塘路飛晴泥夾道睨立如鳬驚千夫昇石自何所
相以拆節當鼓鼙一夫流喝相和答聲與步應如采齊
觀者跼蹐汗通下彼獨閒暇輕如攜此石非是裝玉砌
此石非是築金堤不為文陛儀禁衛定作礧礎承橈題
儼然一柱方峙立何者偃植為拱斡嗚呼自昔良工心
獨苦大材小用俱難取

素絲行

冰盆綠綵千尺長雪花玉色無晶光機聲札札逐羲御
百褰一一輸文章素姿已是隨時貶妖苗嬌藍還點染
東鄰巧婦鬪癡妍對刺文禽相掩冉衣裳顛倒那得知
但見新行勝舊時倡優却得被后飾漢庭只集書囊帷
君不見古來志士多慘戚古貌古心少顏色

觀奕篇

秉燭隨者明奕棋觀者精觀者未必高於奕只是不與
黑白同死生天上神仙何所爭亦復於此未忘情樵夫

柯爛忽猛省却與棋仙作機警千古未盡一局間巖草
巖花自淒冷嗚呼聖主不棄芻蕘言奕棋復出亦必資
傍觀

古栢行

太華山頭有古栢宿柯成銅根化石自從出地受雪霜
直到於今幾千尺向來移種向中州挽之不動艱萬牛
根連玄圃滲七澤鳳凰將雛鳴上頭春草寒花幾衰歇
枯蔓朽株風屢拔歸然此栢安如山匝地清陰覆椒櫨

不辭孤立成大厦
匠石躊躇少須暇

賣花行

紺桃緋杏琴心疊
睡起海棠收醉頰
麝煤輸徹錦薰籠
金脂染就來禽帖
姚家魏家苦畱春
花信未先紅一捻
賣花老翁正自癡
預喜荷錢出小池
却恨身非殷七七
一日之中成四時
不念書生抱孤節
昨夜東風長華髮

欽定四庫全書



詩經
卷四

一

欽定四庫全書

涉齋集卷五

宋 許綸 撰

七言古詩

次轉庵寄用坡公賦梅韻

一夜酸風驚拉槁雪壓茅簷欲倒孰知寒谷自能春
闢圻瓊枝故相惱兩年舊隱住容成耐冷衝寒起常早
透牕疎影眠未佳擁被孤吟詩易好別來問訊迴相忘
養就苔文從不埽詩人云遠歲云暮自插一枝憐鬢老

孤山在望不可到惆悵餘香委芳草誰邀配食水仙人
長笛橫吹倚蒼昊

次韻胡伯暉喜王簿移梅

水南梅花光似雪撲地香風噴鼻裂詩人不來歲華晚
寂寞巖扃那忍折一朝移向凌風前雕欄碧甃生寒煙
聘以新詩壽芳酒洗空遺恨春濺濺住山多時識幽潔
行到臺邊忽淒咽故園萼綠正相思冷却東臯半犁鐵
仇香種梅已開而出鄉未歸再次伯暉韻

憶醉江南枝上雪愛詞人把羅巾裂篇成皓齒發瓊姿
酒盡貂裘堪當折如今消得督郵前期會紛來鬧似煙
故人一枝久寂寞新愁萬斛誰洗濺仇香有意移芳潔
索笑不來空哽咽幸自花開君不歸一夜孤根冷如鐵
欲雪懷度雲新種梅三次伯暉韻

朔風動地天欲雪澗底孤松定皴裂憶梅已覺腸九回
賦詩敢愛肱三折簾疎香細度雲前想見娟娟媚晚煙
主人吟哦伴幽獨醉墨不惜花袍濺人與寒枝共修潔

未遣調羹笛休咽販馬江頭得句回踏破蟾光敲鐙鐵

次韻誠齋醉卧海棠圖之什

繪放翁醉帽墮地

海棠寧莫種種須千萬株濯錦江頭錦漫谷斧斤不赦
如薪枯乍逢樵人莫逢楊氏女遺恨年年泣朝露楊氏
自媚昭陽宮海棠自映扶桑樹山城幽獨逢坡翁一洗
千載塵埃蒙張園錦障人所惜醉裏看花盡英特酒滿
衣襟花滿裳只許茶鐙近筆牀顧影鬢髻醒還卧烏巾
正堪漉白墮只恐明朝雨霏霏花雨征帆各自飛休論

長篇與短韻且與春風寫音問此人此句皆可圖底須
紫鳳并天吳

次韻誠齋飲張園放翁酌酒海棠花下

九霞觴翻濕雲幄羣仙戟指嫌輕薄海棠枝上管春晴
醉魂未醒來層城風姨妬吹銀燭滅明月飛來更奇絕
急須巢飲添燭光今日綺霞明日雪濯錦江頭識放翁
翁令對花羣玉叢試澆以酒添花暈是酒是花君試問

次轉庵榴花韻

良辰競渡常偃指愛花頌花奚謗毀年年五月見紅榴
重着賜衣憐杜甫佳節有名名不去閔甫逢辰何自苦
薄俗傳訛成力競作戲輕生為酒使惆悵劉郎擊節詞
招屈亭前但流水明當鍊鏡非常規我輩持觴寧越矩
只為榴花飲亦佳況是轉庵嗟入髓浮花浪藥竟何為
穠艷芳心誠可喜不應寂寞負澄鮮同社聯翩須記取
相期竟到無何鄉徙倚更約憑虛子

再次轉庵韻

安石移根煩使指花盛紅綃誰擘毀封姨妬作阿醋呼
同調何殊申及甫肯憐顛倒落絳英祇覺韓公用心苦
流傳午節遂成例萱草戎葵併驅使真能染却白雲殷
靈圃鮮繁金谷水詩人愛節因愛花射團點綴追前矩
炎官鍊丹成絳雪獺膽分杯凝赤髓誰言不似舞裙紅
色相異觀特私喜點化精神欲然句晉宋風流坡獨取
鄙哉摘實兒女見却要餅罌結多子

再次轉庵催結局韻

賦花必花指喻指花若堪諛亦堪毀轉庵賦梅工賦影
祇竟呂刑元是甫節逢五日賦榴花擬別甘酸亦良苦
猶之論畫先論形形似丹青誰不使豈知雪裏有芭蕉
滿壁滄溟本非水方臯相馬羣自空梓匠揮斤風即矩
續絃何處覓鸞膠起死底須求鳳髓榴花可翫不可食
昌歎無甜人自喜肯將粉淚匹紅巾眼高一世坡仙取
花事方殷催結局還許殿後吟些子

同轉庵諸人筠齋賞荷花次轉庵韻

一笑筠齋同集客
眼省荷花笑中坼
未說賞花先賞葉
破曉清香晨竟夕
了知出水非雕飾
乍覺臨流似塗澤
多情落日助酣紅
爭媚清漪動寒碧
其間得意誰最多
幾箇文禽不容隻
錦鱗似梭躍流黃
雨蓋如鎔傾大白
同社持觴聊破戒
行令傳花非俚畫
昆明撐舟真錦渡
太華如船儼仙籍
明朝定爾傳新篇
今日衰然有詩伯
詩來忽起西湖思
我輩已覺蓬萊隔
憶曾畫船作夜游
親聽菱歌和露摘
南高北高祇在眼
長橋短橋頻泛宅

掛冠神武吾盍歸奏篇未央君盍適便應獻策取貂蟬
馬用孤吟和螻蛄功成五湖有成例全賜西湖底分擘
回視筠齋乃坳堂豈須更許漁爭席紅蓮綠水姑相娛
明月夜光成浪獲當暑清風誦三過真是雙清泯心迹

再次韻

急雨撒珠泣淵客疾風捲荷波濤坼須臾雨過即風休
但有水香浮月夕水到飛霞幾斷港安得紅雲藏數澤
兒曹問津本何有茭葑蒙茸填淤碧劃開天宇鏡面平

蕩漾漁舟自雙隻老慙數溷煩擊鮮筠外栽蓮供醉白
客來意坐夜沈沈境以客重聲籍籍清纓濁足隨去取
水寬地窄易區畫轉庵夙昔董詩盟同社歌呼劇歡伯
婆娑得句俄朗吟欸乃答聲非賈隔乃知神語天亦相
仍使菱歌夜猶摘著身勝處即水壺混俗靜中無火宅
我雖愛嗟無好句其奈處閒聊自適未能汗漫據龜蛤
何補官私響蛙蠲天籟自鳴忽聞蟬衆作俱暗推巨擘
恍思南塘香百里擬汎具區帆一席更嗟賞實起饒涎

細剥蓮蓬珠貝獲不如藏六守筠齋水落霜枯且投迹
次韻才叔賦菊屏

賓主鑑坐成三丁以菊分題君得屏兩屏夾立君中坐
君其吉兆當屏星化工開花等兒戲園子結花象物形
宗英乘船正蕩漾而我對塔方岩亭人幸似花同臭味
花亦與人共芳馨菊潭之水明且清楚畹之英駐而齡
細思杜老看誰健爭似劉伶終不醒男兒聞健且飲酒
良辰莫作癡凍蠅

五言律詩

紹熙改元早起

元日好天氣侵晨供佛燈生逢大庭氏閒作小乘僧報
主須身健勤家且夙興一貧容易飽四海願豐登

元日

新受開禧歲難逢慶會辰感恩淪骨髓無力報涓塵抱
甕供春事加餐作幸民屠蘓須滿引且願病離身

元日簡轉庵

遙想潘夫子元正免立墀已傾新歲酒未和隔年詩老
色長欺鬢春風不肯絲人言金可作寧惜草堂資

次宣甫用轉庵韻賦惜春懷轉庵

氣合桑興友才推屈宋衙留春無上策作意惜殘花葭
倚終慙玉蓬生正倚麻陶溪人遠室漳浦客思家

次韻轉庵書懷

應節何妨俗傷春已是翁百年詣社酒萬里憶邯鄲話
舊肱堪折追歡袖畧通潘郎久不見妙語想蘋鴻

秋思

秋色已彊半秋光纔較清
卷簾為月地入戶得潮聲
螢度催兒課蛩吟覺婦驚
起看河漢畔星象濕晶瑩

次韻常之秋日郊居十首

秋日郊居好風光屬散人
雍容觀物化瀟灑任天真
菊好笑投老楊疎柳效顰
飛翻看兩蝶喜得自由身
田里逢年歲江山淨物華
栖糧供野雀輸賦答官蛙
鰕鯿眠穰圃龍鍾卧酒家
不須聽擊壤平世此何加

年光本尅期秋閨似移時斷鴈餘新綆殘蟬泥舊枝黃
華隨露展烏帽受風欹預有登高興秋風入夢思

窮巷家何隘秋郊景自舒草塗飛蚱蜢蓼岸點春鋤鰕
菜通潮信魚蒲傍海居飯蕪稱柳市別業計非疎

寄種儕孫稻株株欲競齊年豐催釀螳夜半想聞雞野
老同杯酌忘形絕町畦雖無花泛水終恐世人迷

涉世味何疎師心道與俱古風詩入律遠景句成圖一
語中標的千篇徒囁嚅秋光照軒豁我輩未囚拘

學閫難優入詩堂僅許升百年從皓首一醖愛秋燈次
第掛冠老晨昏有髮僧未能逃兀兀祇欲任騰騰

龍翔江上水萬折只朝宗依倚惟危檻扶持有短筇秋
山成自獻落日為誰容臨眺餘嘉菊重陽酒自供

詩分綠稼穡別墅故人多又過中秋閨無如明月何違
離增寂寞哀病廢吟哦十首撩人甚重翻古井波

覓句無新語懷人有故情歸音蘇酒渴詩法釀秋清近
種芙蓉發低鋪錦繡成雖賒新甕熟臘醞待同傾

次韻吳季行秋懷

彈冠驚野馬東帶響吳鉤
意遠秋多思詩清語過愁
君當儀省戶我合老林丘
何日茗溪上相從不繫舟

冬日邀友同賞

令溫風有信林靜葉無譁
別種桃舒萼先期梅著花
成蹊餘屐齒索笑見簷牙
未飲朝來酒何妨飯後茶

念九日早聞雪

去歲一冬暖開春逾月晴
伸眉來雨意變色起雷聲
搖

動園林喜驪呼鳥雀鳴閒中多感激詩句亦生成

歲除日見白髮詩

四十明朝是俄驚白髮新舊詩曾探借今語遂為真不
恨身將老惟憐學轉貧婆娑花縣底誰復念安仁

除夜齋宿

老境慙年長齋居惜歲徂難分阿戎炬只擁玉川爐夜
雨知時落朝陽謫見無君王素修德安意飲屠蘇

新晴二首

入院餘旬決今朝始快晴纔聞烏鵲語已有蜜蜂聲到
眼花枝暖粘鬚柳絮輕重門無箇事詩意正關情
宿雨居然閣頑雲掃似開嵐光湖上出霽色柳邊來鈴
鷓搏風轉箏鳶掣綫回脩廊閒勃窣花影上蒼苔

禱雨有喜

已用計然策猶煩傳說霖綿延三日往慰藉九重深柱
礎收餘潤摩圍散薄陰何庸尸祝力聖主自誠心

次韻轉庵喜雨二首

通夕聞鳴雷凌晨起炷熏映山高見雨隔塢遠留雲虛
橘明金彈安榴染絳裙樓居堪護足終羨蝶飛紛
榴綻千重束葵開一丈紅為憐花寂寞却念雨溟濛此
去須時若相將喜屢豐閒中有忙事祇得撓鄰翁

再次韻醺轉庵

經梅多過溽轉蕙擬吹薰山脚昏酣日簷牙曉墮雲病
忺添御袂筆懶習書裙那得驚人句聊將絕世紛
萬木稠新綠孤花委晚紅山容隨隱見雲影度空濛農

老無嫌問人言不害豐破愁還作喜結句答鄰翁

德久雨遷魚莊賦詩縱臾

漫雪蝸爭席翻泥蚓近床不堪聽鸛垤應喜得魚莊帶
雨移行李攜孥問野航西湖第一義佳句已難忘

再用韻答轉庵

嵐光趨澤笏波影漾湖床借竹欣移宅看花擬宴莊鐘
聲來佛屋鏡面濟慈航莫便疎城市詩盟未可忘

再和二首

晴日烘船屋薰風傍筆床未穿三益徑已想百花莊野
火明僧寺樵歌度客航山頭明月上酒興故難忘
城市從疎出何人獨拜床不辭乘下澤久已厭康莊借
屋欣憑閣臨湖似樣航風波無用避端與世相忘

鄉會游湖懷南床復次韻

名園鄉黨敬莫可致南床盛事聯千佛諸公競一莊建
侯期朔漠駐蹕尚餘杭報國平生志他年幸勿忘

再戲和轉庵

孰裏經旬飯誰同夜雨床何妨散花女聊伴食魚莊擬
喚桃根渡還思范蠡航江湖真落手身世可兼忘

寓居

野水生洲面閒雲傍屋顛鐘鳴人已定月滿句初圓花
徑經過少苔文長養便行藏隨處是安用買山錢

得東山居主人戀家不出因借戴希周漁鄉居

賦雜興六首

借得漁鄉住分明似水仙好山排座右明月到尊前掛

綵迎朝日飛霞帶晚煙往來真自在易覓釣漁船

借得漁鄉住蟾光忽滿輪金波隨短棹銀漢有通津幾
度中秋月今宵自在身一尊消得醉眼底欠詩人

借得漁鄉住心安即是家客來時舉酒飯後定分茶野
老從爭席山童解獻花扁舟隨意坐不羨斗邊槎

借得漁鄉住閒居氣味長新霜濃淡白早橘淺深黃
勲業錦囊句光陰寶篆香故人如訪問宛在水中央

借得漁鄉住詩家物色宜葦聲魚撥刺竹影月參差風

鐸時成曲山童解答詩閒居多樂事惟有此心知
借得漁鄉住清霜已著秋丹楓如錦障黃菊似錢流物
理觀諸妄吾生等一漚得閒聞健好隨寓且夷猶

次韻石謙伯山居

地僻人為勝居閒樂自知書聲山響亮琴韻水逶遲為
藥藤修架因花槿結籬藍田冷松竹那得久怡怡